



30. september 2025

UKA2025/11

Uunga siunnersuut: 2024-mut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Akileraartarnermullu Naalakkersuisoq)

Siullermik ilisimatitsissutigissavarput nunatta karsiata naatsorsuutai upernaakkut siullermeerneqartarnerat ingerlasaraluarmat, aatsaallu ukiakkut inaarutaasumik suliarineqartaraluarlutik. Ilisimaneqartutuulli upernaag manna qinersisoqarnera peqqutigalugu pissutsit naliginnaasut allaanerupput, taamaattumillu maanna ukiakkut nunatta karsiata naatsorsuutai aatsaat siullermeerneqartussanngorluni.

Siumumut sinnerlugit Nunatta Karsiata 2024-imut naatsorsuutai akuerineqarnissaat pillugu inatsisartunut aalajangiiffigisassatut siunnersuutip siullermeerneqarnerani imaattunik oqaaseqaateqassaagut.

Siumumiik oqaatigissavarput nunatta karsiata naatsorsuutai 2024-imoortut ukiut siulii assigalugit naatsorsuutit naalagaaffiup akuerisaanik kukkunersiuisuniit nangaanartortaqaartinneqaratik oqaaseqaatigineqarfigineqarsimanerat.

Nunatta karsiata naatsorsuutai pillugit kukkunersiuiinermut ataatsimiisitaliaq aasap ingerlanerani isumasioqatigissimavoq (tassa seminarerpoq) naatsorsuutit pillugit apeqqutit assigiinngitsorpassuit Naalakkersuisuniit itisilertinnissaat siunertaralugu. Taannalu suliaq piareeriarpat maani inersuarmi aamma saqqummiussisoqarlunilu samminninnissatsinnut itisiliinerunissatsinnullu qilanaarpugut. Siumumiillu ataatsimiisitaliami suleqatigilluarsimanitsinnut qujarusuppugut.

Nunatta karsia 2024-imi Ingerlatsinermi, Sanaartornermi, Taarsigassarsititsinerlu (DAU: Drift Anlæg Udlån-imik taaneqartartoq) aallaavigalugu 250 mio.-nik amigartooruteqarfiuvoq. Aammalu Ingerlatsinermi, Sanaartornermi 257 mio.-ulluni amigartooruteqarfiulluni.

Nunatta karsiata amigartooruteqarneranut peqqutaanerpaajupput, makku:

- Ingerlatseqatigiiffiit inuiaqatigiinniit pigineqartut sinneqartooruteqanngitsoornerisa malitsigisaanik nunatta karsianut isertitassaagaluit pinngitsoornerat. Tamanna kr. 187 mio. naleqarluni.
- Ingerlatsinermi aningasartuutit qaffariarsimanerat, soorlu peqqinnissaqarfiup iluani sulisoqarnermi vikarinut aningaasartuutit annertuseriarsimanerannik tunngaveqartoq.
- Kommunit annertunerusumik aningaasaliisimaneq. Tassa ukiumoortumik kommunit aammalu Naalakkersuisut akornanni isumaqatigiissut malillugu aningaasaliinerit malitsigisaat.



Siumumiit ersarissumik oqaatigissavarput ukiumoortumik tapiissutit siunertamut atorneqarnissaat pingaaruteqarmat. Taamaammatt Siumumiik ataatsimiisitaliatigoorlugu ugartussagatsigu kommuninut aningaasaliissutit eqqortumik atorneqarsimanerat qulaajaaffigineqarnissaa. Isuma qarattami ukiuni kingullerni soorlu nuna qarfinni isorliunerusunullu aningaasaliissutaasartut eqqortumik atorneqartarsimanersup paaserusukkatsigu. Assersuutigalugu nuna qarfinni isorliunerusunilu illuliorsinnaanermut aningaasaliissutit kommuninut ukiumoortumik aningasaliissutitigut periarfissiissutaasut ilumut siunertaminnut atorneqartarnerat qulaajaaffigisariaqartoq Siumumiit isuma qaratta.

Siumumiit aamma isuma qarpuqut ukiut siuliini aningaasatigut inissisimalluarneq tunngavigalugu maanna assiliap allanngoriartornerata tunngavigalugu siusinnerusukkut partiiniit isumaqatigiissutigisimasarput tassalu Nunagreen-imut tunngasut nalilersoqqinnissaat pingaaruteqartoq.

Taamatuttaaq Siumumiit pingaartipparput aningaasaliissutit ilumut siunertaminnut atorneqartarnerata apeqqutigisarnissaa pingaartuusoq. Tassami aningaasanut inatsimmi siorna isumaqatigiissutigigatsigu soorlu katsorsaasarnermut aningaasaliissutit inuiaqatigiinnut qanoq iluaqutaanerulersinnaanersut qulaajaaffigiuartariaqartoq, taamaattumillu katsorsaariaatsit allat periarfissinnissaat pingaarutilittut isigigatsigit.

Oqallinnerni Siumumiit arajutsisimanngilarput nunatta aningaasatigut inissisimanagera isumaqartinniarneqartoq Naalakkersuisuusimasut tukkorpallaarsimanerannik. Tamanna ilumuunngilaq, kisianniliuna ingerlatseqatigiiffiit sinneqartuunngitsoortut kiisalu peqqinnissaqarfimmi ingerlatsinermi pisariaqavissumik aningaasartuutaanerusut minnerunngitsumillu aalisagartassiissutit ukiumoortumik annertussusilerneqartartut appariarnerisa malitigisaanik nunatta karsiata amigartoornera pisoq. Siumup akisussaaffini qimarratiginavianngilaa kisiannili eqqortumik piviusumillu tunngavilimmik oqallinnissaq pingaartillugu.

Taamatut oqaaseqarluta nunatta karsiata naatsorsuutai, naatsorsuutillu sinneri malitsigisai ilanngullugit kukkunersiuinermut ataatsimiisitaliamit aappassaaneerneqannginnermini suliarineqarnissaat innersuussutigaaqut.

Qujanaq.

Erik Jensen
Siumut